

Tutu e táxnūu San Pablu iña ñá ñuú Efesu

Taxnūu Pablu tutú iña ña ntákuinti'xe i, ñá ntoo ñuú Efesu

¹ Xu'u é Pablú u ne, pustru iña Jesúcrístú u tsí kuan ō ntío Xuva kō é tēé tsiñu ña ko. Taxnūu ú tutú sá'á iña ña ntáduku ntée Xuva kō, ña ntoo ñuú Efesu, ña ntákuinti'xe i Jesucristu. ² Xuva ko nī Tó'o ko Jesúcrístú ne, na nāxnūu viko ña nto. Na tā'xi ña é kuntōo vá'a nto.

É vā'a é kata'xi Xuva ko kuēnta iña Jesúcrístu

³ Dōo ka'nu Xuva ko, ñivi Uvā Tó'o ko Jesúcrístu. Dōo tá'xi ña kō é un ntí'i nūu i é vā'a é tuví e dukún kán tsi kúdadíi o nī Cristu. ⁴ Tsí dí'na dá tuví ñuxiví san ne, nākaxnúu Xuva ko ko kuēnta iña Cristu vata koo é na ntāntoo ña nima kó, vata koo é ña tuví ka kuétsi ko tē xee o nta'a ña. ⁵ Tsi dóo ntío ña kō ne, nté dí'na kaka'an ñá tsí ki'i ña kō é kuvi o i'xā ñá kuenta iña Jesúcrístu, vata ō ntío ña. ⁶ Dukuān né, utén uten ntáka'an o tsi dóo ka'nu Xuva kō. Dōo vá'ā o dé ña ni kō. Nā ni dē vīni ña da tá'xi ñá ko l'xā ña, ña e dóo kuinima ña. ⁷ Nákakū ñá ko kuēnta iña l'xá ña, tsi étí ña ñiñi ña kuēnta iña ko. Dē ka'nu iní ña ni kō kuetsí kō, tsi dóo ntío ña kō. ⁸ Nā te un sīin tsi kuínima Xúva ko kō ne, tā'xi ña é kūtú've kō, é ki'in iní ko. ⁹ Tā'xi ña é kūtuni ko nee iña é ntío ña, nuu i é ña ni iní ō, vata ō ntío ña. ¹⁰ Sá'ā dé kuení Xuva kō é vii ña dá xēe ntúvi i. Natáká nuu ña é un ntí'i vata koo é kodo nūú Cristú da neé ka é ió e dukún kan ni da neé ka é ió ñuxiví a.

¹¹ É kudadíi o nī Cristú ne, nākaxnúu Xuva ko ko ūun tsi nte dí'na vata koo é nī'i ko iña ña. Kuān o dé Xuva ko vatā o é vā'á o kuíni ña. ¹² Kuān o dé ña vata koo é ntí'i, é dí'na ntí kuinti'xe ntí Cristú ne, vií ntí vata koo é kā'an ñá'a tsi dóo ka'nu Xuva kō. ¹³ ñivi ntō ñi, dá tekū nto tú'ūn é nuu é ntaā i, dá tekū nto nté koo nakáku nto ne, kuinti'xe nto Cristu. Kudadíi nto ni ña né, xntēé Xuva ko nto nā'a da

tá'xi ña Espíritū Sántū é kunūu ña nima ntó vata o tá'xi ña xu'u ña. ¹⁴ Ta'xi Xuva ko Ēspíritū Sántu vāta koo é kūtuni ko tsí víi nti'xe ña vata o tá'xi ña xu'u ña dá kūvi naki'i ña é un nti'i nuu i é kāduku ntée ña. Kidáa ne, ka'an ñá'a tsi dóo ka'nu Xuva kō.

Kaikán Pablu nta'a Xuva kō é kuē'e ña é na kuki'in iní ña ntákuinti'xe i

¹⁵ Dukuān ne, da téku ko tsi dóo ntákuinti'xe nto Tó'o ko Jēsuú ne, tsi dóo ntákuinima nto ta'an ko, ña ntákuinti'xe i Xuva kō ne, ¹⁶ ñá kaxtuvī mií u é nakué'e ú sintiá'vi nta'a Xuva ko kuēnta iña nto. Kanaka'ān kó nto dá kakā'an ntā'ví u. ¹⁷ Kaikán u nta'a Uvā Tó'o ko Jesūcristú, divi Xuva kō, ña e dóo va'á san, te tā'xi ña é kūtú've vá'a nto iña ña, vata koo é kī'in diki nto é kaka'an ña, vata koo é kiní va'a ntó ña. ¹⁸ Kaikán u nta'a Xuva ko te nāxi'í nuu ña nuu nto vata koo é kūtuni ntó nēe é nī'i nto é kāna ña nto. Te tā'xi ña é kūtuni nto tsí ña te nté kaa va'a, ña te nté kaa kuika nuu i iña Xuva ko é kaxé'e ña ña'a é nakuído da'an ñā. ¹⁹ Te tā'xi ña é kūtuni nto tsí ña te nté kaa ka'nu ña. Kakuvi víi ña é un nti'i kuēnta iña kó, divi o e ntákuinti'xe ko ña. Nañē'e ñá kō tsí kuvi víi ña nī é un nti'ī ²⁰ dá nantōto ñá Cristú rkontuvi é xi'i ñá ne, xé'e ñā é kutuvī ñá diñi kua'a ña e dukún kān. ²¹ Díi ka ka'nu Jesuu é da xōo ka ña tsiñu na'nu i, da xōo ka ña tsiñu i, da xōo ka ña ntádē kú've e dukún kan, da xōo ka ña ntádē kú've ñuxiví a, da xōo ka ña e dóo ka'nu, kuān te ntóo ña vevii, kuān te ntóo ña ntuvi é kī'in o. ²² Ta'xi Xuva kō é kūvi víi Cristu ni é un nti'ī. Tā'xi ña é kūvi Cristu tó'o iña un ntíi ntíi nuu i é kāduku ntée ña ntákuinti'xe i san. Cristú ne, divi ñā é kadē kú've ñá kuēnta iña ña ntákuinti'xe i san. ²³ Ña ntákuinti'xe i sán ne, vata ntáa kúñū Cristu ña. Kanuu me'ñu kanuu dava ña ña ntákuinti'xe i sán ni da kanii dū'va ñuxiví san.

2

Nakākú Xuva ko kō, tsi dóo kakuinima ñá kō

¹ Ta'xi Xuva ko ntuvi vā'á iña nto, divi ntó é vata ntáa ña xi'i ntáa nto kídaa kuēnta iña kuétsi ntó, dá vāta kuintí'xe

nto Cristu. ² Dōo ncho víi nto kuétsi kídaā, dá ntikin ntó vata xkoó ini ñá ñuxiví san. Dé ntaa nto é ká'an tó'ō e ña vá'ā san, ña é kadē kú've iña é ña vá'ā é ntoo e dukún kán, diví é káka'an nté koo víi ña'a, ña é ña ncho kuintí'xe i Xuva kō. ³ Kuān o dé o, ūn ntíí ntíi o, kídaā. Éde o da mií é ntio kō. Dē ntaa o é káka'án nima káni ntáa kō, e ntádē kuení kō. Dukuān ne, kantio é nī'i ko é ntō'o ko e dōo ka'nu é kata'xi Xuva ko, ni ūn ntíí ntíi ka ña'a. ⁴ Ntá tsi un vá'a tsi ntúnta'ví ini Xuva ko kō, tsí ña te nté kaa kakuinima ñá kō ne, ⁵ ta'xi ña ntuvi vá'á iña ko kuenta iñá Cristú, kuān te kantio é nī'i ko doxi'i kuenta iña kuétsi kō. Da mií tsí e dōo va'á Xuva kō é nakakū ñá kō. ⁶ Vata ō ntóto Tó'o ko Jesūcristú ne, kuan ō nántoto ña kó di ne, ta'xi ña é kuntoo dadíi o ni ña e dukún kán, tsi kuínti'xe ko Jesūcristu. ⁷ Kuan ō dé ña vata koo é nañē'e ñá ña'a rkontuví ve tsí un vá'a tsi kakuinima ñá kō, tsi dōo vá'ā ó de ña ni ko kuenta iña Jesúcristu. ⁸ Da mií tsí e dōo va'á Xuva kō é nakakū ñá nto da kuínti'xe nto. Ña túvi nēe nuu i é víi mií nto é nākáku nto, ntá tsi doméni tá'xi Xuva kō é nākáku nto. ⁹ Ña kúvi víi o nee nuu i é nākáku ō, vata koo é ña víi ka'nu ō. ¹⁰ Tsí Xuva kō de kú've ñá kō vata koo é da ntántikin o Jesuú ne, víi ō é vá'á, vata ō ka'an Xúva kō nte dí'na é víi o.

É kuntōo vá'a o kuēnta iñá Cristu

¹¹ Dukuān né, naka'an ntō nte ntáa nto dí'na, divi ntō é ña te ña Israeé nto. Ntáka'an ñá Israeé san iña ntó “ñá'a, ña é ña ni té'nte kúnū é íxi i”, tsi ntántikin ña vata xkoó ini ña e ntaé'nté ña kúnū ña, kuān te mií tsi ñá é'nte ña. ¹² Kidáā ne, váta kīni ntó Cristu. Tuku ña'a nto é ña Israee. Ña túvī nee iña é intétu nto, ntē ña ni iní nto xoo é Xuva kō. ¹³ Ntá tsi vevíi ne, kudadíi nto ni Jesūcristu. Divi ntō é ña ni kuvi ki'xi étsin nto Xuva kō kídaā né, ntoo ni'i nto ñá vevii, tsí éti Cristu níñi ña kuenta iña nto. ¹⁴ Tā'xi Cristu é kuntōo vá'a ō, tsí idé ña é ntūdadíi ña Israeé san ni ña e ña te ña Israeé san. É nākaán nuu ña mí'i kánti'u kídaā da ntánāa núu ña Israeé san ní ña é ña te ña Israeé san. ¹⁵ Dā xi'i ñá ne, nantí'i ña leí san é káka'an nté koo víi o, é kadē

kû've iña ko. Uun tsi ña'a, ña é xēe, ntáda dadii ña ntuvi ñá'a san, tsi ntákuinti'xe dadii ña Xuva kō. Kuān o dé ña vata koo é kuntōo vá'a ña ni tā'an ña. ¹⁶ Dukuān né, dā xi'i ña ntíkā krusi kán ne, nantí'i ña du'xēn é ēdé ntuvi ñá'a san vata koo é kūvi ntuvá'a dadii ña ni Xuva kō. É uun tsi ña'a kúvi ña ve.

¹⁷ Vé'xī Cristú ne, ka'an ña nté koo kuntōo vá'a nto, ðivi ntō é vata kiní nto Xuva ko, ni ñá'a san é ini ñá ña. ¹⁸ Kuenta iña ña kuvi kí'in etsin o nuu Xuva ko, tsi é ni'i ko Espíritu ña, ntuvi ō. ¹⁹ Dukuān ne, ñá te ñá tuku ñuú ka nto, ñá te ñá é doto tsi ntaíka ká nto, ntá tsi ña ñuú Xuva ko nto vē. Ña ví'i Xuva ko nto vē ne, dadii xnto ni ñá e ntáduku ntée ña. ²⁰ Vata kaa ví'i san ntáa nto, tsí odo nto nú eti ví'i san. Eti ví'i sán ne, ðivi tū'un é nakuá'a pustrú san nī ña ka'án naa Xuva ko. Mii Jesūcristú ne, xuu é odo nūu diñi ntii ví'i san. ²¹ Xo'ō é kudadii o nī Cristú ne, kuve ta'an o vāta ntáa ntíká nto'o é xī'í ta'an va'a un ntíi ntíi diñi i, da nté ntuvi o xūkún Xuva kō mí'i ña kakí'vi nté uun nuu i é kīni kaa. ²² ðivi ntō ði, dá kudadii nto nī Cristú ne, kuve ta'an nto nī ña ntákuinti'xe i san vata koo é kūvi nto xúkun Xuva kō, tsí nuu Espíritu ñá nima nto.

3

Divi tsīñu Pablu é kā'an ña tú'un va'á san nī ña é ña te ña Israee

¹ Dukuān ne, xu'u é Pablú u ne, nuu kutū ú kuenta iña Jesúcristu, váta koo é ðivi ntō, ña é ña te ña Israee nto, ní'i ntō é vā'a. ² Á te ini nto tsi dóo vá'a o dé Xuva ko ni kō da tée tsiñu ña ko é kā'án u tú'un ña ni ntō. ³ Tá'xi Xuva kō é kūtuni ko é tuvi xu'u iña ña, vatā o dé vá'a ú ði'na é ña kué'e tsi tú'un é kaka'án u. ⁴ Dā nakua'a nto tú'un tsikán ne, kūtuni nto tsí ini u nuu i é tuvi xu'u iña Cristu. ⁵ Dá nté vevíi ne, ñá ni xē'é Xuva kō é kūtuni ñá'a. Ntá tsi vevíi ne, e xé'e Xuva ko kuēnta iña Espíritū Sántū san é kūtuní pustrú san nī ña ntáka'án naa Xuva ko. ⁶ Sá'a ne, nuu i é tuvi xu'u kídaa: tsí ña é ña te ña Israee ne, dadii tsi ni'i ña iña Xuva ko nī ña Israee san, tsi e kúdadii ña nī ña Israee

san kuenta iña tú'un va'á san. Ní'i ñā é xē'é Xuva ko xū'u ñā ñā dá kuinti'xe ñā Cristu.

⁷ Tēé tsiñu Xuva kō ko é kā'an ntódo u tú'un sa'a, tsi dóo vá'ā ó de ña nī kó ne, tā'xi ñā kó ntii ñā vata koo é kūvi víi u tsiñu sā'a. ⁸ Xu'ú ne, díí ka dutsi kaa u é ñā e díí ka dutsi kaa é kāduku ntée Xuva kō. Ntá tsi dóo vá'ā ó de Xuva kō, tsi tá'xi ñā é kā'an u nī ñā é ñā te ñā Israeé san tú'un va'á iñá Cristu é díí ka nuu á'vi é ntē ñā ini o nté kaa. ⁹ Ta'xi Xuva kō, ñā é de kû've é un nti'í é iō, é kā'an ntódo ú vata koo é kīni un nti'í nti'í ñā'a nté o de kú've ñā é koo nuu i sá'ā e xtúvi xu'u ñā un tsi nte dá iñi ntu'u ñūxiví san. ¹⁰ Kuān o dé ñā vata koo é kūtuni un nti'í nti'í ñā e ntádē kû've e dukún kan tsi dóo ini Xúva kō é un nti'í nté koo vii ñā dá kinī ñā ñā ntákuinti'xe i san. ¹¹ Un tsi nte dí'na kuān ó ncho víi ñā kuenta iña Tó'o ko Jesūcristu. ¹² Kuenta iñá Cristú ne, ini o tsí kuvi xee étsin o nuu Xuva ko. Tsi te kuinti'xe ko ñā ne, ñā kaū'ví ka ko ñā. ¹³ Dukuān ne, kaka'an u ni nto tē ñā nátivi iní nto é kuān ó kanto'o kó kuenta iña nto. Tsi xu'ú kanto'o kó vata koo é ní'i nto é vā'a.

Kakuinimá Cristu nto

¹⁴ Dukuān né, kanchití ú nuu Xuva ko, divi Uvā Tó'o ko Jesūcristu. ¹⁵ Uva ñā iña un nti'í nti'í tātá ñā'a sán ñā, kuān té ñā ntoo e dukún kan, kuān té ñā ntoo ñūxiví a. ¹⁶ Kaikán u te tā'xi ñā é kunūu ntii nima ntó kuenta iña Espíritu ñā, tsí ñā te nté kaa iō é vā'á iña ñā. ¹⁷ Kaikán u te kunūu Cristu nima ntó da ntákuinti'xe nto. Na tā'xi ñā é kūtú've vá'a nto nté koo kuinima ku'élen nto, ¹⁸ vata koo é kūtuni ntó, ni ūn nti'í nti'í ñā ntáduku ntée Xuva kō, nté kaa ní'i, nté kaa kani, nté kaa kūnu, nté kaa dūkun kaxee tá'an é kakuinima Xúva ko kō. ¹⁹ Kaikán u te kinī nto nté kaa ntio Cristu kó, kuān té ñā kuvi kadá kuení kō tsi dóo ku'e, vata koo é kū'un tsitu kue'én nima ntó Xuva kō.

²⁰ Dōó ka'nu Xuva kō. Dōó iō ntii ñā é kāde tsiñu ñā nima kó ne, kuvi víi ñā díí díí ka va'a é kaikan o, díí díí ka va'a é kadā kuení kō. ²¹ Te kā'an ñā'a tsi dóo ka'nu Xuva ko kuēnta iña ñā ntákuinti'xe i san, kuenta iña Jesúcristu.

Kuān koo ka'an ñá da ntántoo ká ña'a san ñuxiví a ne, ntii dañu ntūvi di. Kuan tsi koo na kōo.

4

É uun tsi kúñū kúvi o kuēnta iña Espíritū Sántū san

¹ Xu'u é nuu kútū ú kuenta iña Xuva kó ne, kaikán u nta'a nto te vii ntó yatā ó ntio Xuva kō é víi ña e kána ña.

² Ñá víi ka'nu nto. Ñá ku kudíin nto ni ña'a. Na kūtíi nto kuntétu nto. Na kūtíi nto ni tā'an nto. Na kuñima ntó ña.

³ Koo ntii ntō é ña xtuví mii ntō é uun tsi ntádē kuení nto vatā ó katá'xi Espíritū Sántū san dá ntoo vá'a nto. ⁴ Uun tsi kúñu nto, ni ūun tsi Espiritu ntō dí, vatā ó ió uun tsi nuu i é vā'a e ntantétu nto é nī'i ntó rkontuvi, nto'o é kána Xuva ko ntō. ⁵ Uun tsi Tó'o kō, uun tsi tú'un vā'a é kuinti'xe ko, ni ūun tsi nuu i é kutsi ntute o. ⁶ Uun tsi Xuva ko, ñi'vi Uva ko ūn ntíí ntíi o. ñi'vi ñā é odo nuū ña é un ntíí ntíi o. ñi'vi ñā é nuu mé'ñu nuu dava ña ko ūn ntíí ntíi o.

⁷ Ntá tsi é un é un o ne, é tā'xi Cristu ko nuu i é vā'a é vii ó, vatā o ntío ña. ⁸ Dukuān ne, kaka'an tú'un Xuva kō: Da kūntáa ña e dukún kán ne, ntēka ñá ña ñu'u kutū ne, xé'le ña nuū i é vā'a é víi ña'a san, ka'an.

⁹ ¿Nee iñá ntu kani tu'un é kaka'an é kūntáa ña? Ncho ka'an tsí di'na naínu ña ñu'u a. ¹⁰ Ña e naínú san ne, ñi'vi tsi ñā é kūntáa ña mí'i e dií ka dukun e dukún kán vata koo é kadā kú'vē ñá da kanií dū'va. ¹¹ Tā'xi ña nuu i é vii o, é un é un o. Iō ñá ne, xé'le ñā é vii ñá pustru. Iō ñá ne, xé'le ñā é ká'an ñá naa Xuva ko. Iō ñá ne, xé'le ñā é ká'an ntódo ña tú'un é nakáku o. Iō ñá ne, xé'le ñā é kadā kú'vē ñá ña ntákuinti'xe i sán ne, nakuā'a ña ña nchu'ún san di. ¹² Kuān o dé ña vata koo é koo tú've ña ntáduku ntée ña é vii ñá tsiñu ña, vata koo é nakuē'nu ña ña ntákuinti'xe i Cristú san ¹³ da nté dadíi tsi kuinti'xe ko, dá nté dadíi tsi ini vá'a o I'xá Xuva kō. Kidáa ne, kuka'xi nuu o ne, kué'nu o vata koo é un ntí'í é vii ó ne, víi o vatā o dé Cristu. ¹⁴ Ñá víi ka o vatā ó de i'xá san é nuu nuu tsi ntánadama e ntádē

kuení i. Ntántikin dá nēé ka nchu'un é xēe e ntánañē'e ña ntaéni nta'ví san, ña e dóo ntáde é kīni kaa. ¹⁵ Ntá tsi ka'an o é nuu é ntaā í ni ñā'a, tsi ntákuinima kó ña. Kidáā ne, kue'nu ká o un tsi dā nte xee tá'an o vii o vatā o dé Cristu. Dīvi ña né, odo nuū ñā iña ña ntákuinti'xe i sán vatā ó odo nūu diki ko iña kúñu kō. ¹⁶ Xo'ō ne, vata káa kúñu Cristu ntáa o, é dóo vá'ā ó xi'i ta'an é un ntíí ntíí ta'vi ī. Te ūn ntí'i tsi ta'vi ī dóo vá'ā ó ntáde tsiñu ne, dóo vá'ā ó kae'nu kanī kúñu ñā. Kuan koo na kuinima tá'an kō dī, un ntíí ntíí o e ntáduku ntée o Cristu.

Ntuvi xēé iña ko e tá'xi Cristu

¹⁷ Dukuān ne, kaka'án u ni nto vē, tsí ntio Xuva kō é vii nto sá'a. Nā víi ka nto vatā ó de ña'a, ña é ña ini Xúva kō. Dotō tsi ntáde ña é ntio nima kīni ntáa ña. ¹⁸ Nñinēé ini diki ña. Nā túvi ntuví iña ña e tá'xi Xuva kō, tsí ña ntákutuni ña, tsi dóo ka'xi ini ña. ¹⁹ Nā ntákuka'an nuú ka ña é da mii tsī e ntáde ña é kīni kaa. Nā tē nté kaa diní ña é vii ña é un ntíí ntíí nuu i é kīni ntáa san. ²⁰ Ntá tsi dīvi ntō ne, ñā tē dúkuan ō ni nakua'a nto iña Cristu, ²¹ tē nuu é ntaā i e téku nto é káka'an ñā, tē nuu é ntaā i é dīvi ña nakuā'a ña nto; tsí kaka'an ña é nuu é ntaā i. ²² Vatā ó kanatāva o doo dé'én san ne, kuan koo naxtūví xio nto é ntio nima kīni kaa nto, é da mii tsí e ntaéni nta'ví nto. ²³ Kué'e ntō é ntavá'a Xuva kō nima ntó vata koo é vā'á tsi koo kadā kuení nto. ²⁴ Nakunúu nto ntuví vā'á iña nto é dē kú've Xuva ko iña ko vata koo é vii o vatā ó de ña. Dīvi ña ne, kade ña é vā'á ni ñā'a sán ne, ña túvi nēe é kuētsí ña. Kuān koo víi o dī, tsi ntákuinti'xe kō é nuu é ntaā i.

²⁵ Dukuān ne, ñā ká'án ka nto dovéte. Ka'an nto é nuu é ntaā í ni tā'an nto, tsí uun tsi kúñu kúvi o ni ña.

²⁶ Te kūdiin ntó ne, ntá tsi ña ku vii nto é kīni kaa. Nā na'a tsi kudīin ntó dī, na ntūka'nu iní nto dī'na dá kuido nuu ngántii. ²⁷ Ntē ña ku xe'e nto é ká'an tó'ō e ña vá'á san nté koo víi nto.

²⁸ Nā kadú'u sán ne, na xtuvī mii ña é kādu'u ña. Na kōó ntij ña kada tsiñu ña vata koo é nī'i ña é natsi'i ña iña ña ntátaan nuú i san.

²⁹ Nǎ kā'an ḱini nto, ntá tsi ka'an ntó nēe é vā'á, nēe é kaxntii é kuē'nú ta'an nto vatā ó kantio ña, vata koo é na nāxnuu viko ña ña'a, ña kateku í san. ³⁰ Nǎ ku vii nto nee iña é kāde i é kuntā'xa iní Espíritu Xuva kō, tsi tá'xi Xuva kō Espíritū san vata koo é kūtuni ko tsi ntáduku ntée o Xuva ko tē xee ntúvi é naki'i kue'en nǎ kō.

³¹ Xtuvī mii nto é dutsī kuiní nto, nī é kakudiin nto. Nǎ ku nāa núu ká nto. Nǎ ku kāchu'u ntó. Ntē ña ka'an ḱini nto iña ta'an nto. Nǎ ku vii nto nté uun nuu i é ḱini kaa. ³² Ntá tsi vii nto é vā'á ni tā'an nto. Ntuntā'ví ini nto ñā ne, kada ka'nu iní nto ni ña vatā ó de ka'nu iní Xuva ko ni nto kuēnta iñā Cristu.

5

Nté koo é vā'á koo kuntoo i'xá Xuva kō

¹ Vií nto vatā ó de Xuva kō, tsí i'xá ña nto e dóo ntío ña nto. ² Utén utén kuinima ntó ta'an nto vatā o kuínimá Cristu ko dá xe'é ña ntuvi iña ña kuenta iña ko. Dìvi ñā e kúvi ña doméni e dóo va'a, é vata kaa uun diko e dóo vá'a ñe'e iña Xuva ko.

³ Dìvi ntō e ntáduku ntée nto Cristú ne, nǎ ku kā'an nto nté uun tú'un nuu i é ḱini kaa e ntáde ña'a ni ñādī'í san, e ntáde ne'u iní ña ni ñā'a san. ⁴ Nǎ ku kā'an nto tú'un dēntu. Nǎ ku dotō tsí ka'an ntó, ntē ña doto tsí xkuntée nto nuu i é ña vá'a, tsí ña te vá'a o é kuān koo víi o. Díi ka vá'ā ó te nākué'e o sintiá'vi nta'a Xuva kō. ⁵ Tsí ini vá'a nto tsí da xōó ka ña'a é kakidi ni'i ña ñādī'í é ña te ñādī'í mii ñā né, da xōó ka ña'a é kāde ña é ḱini kaa, da xōó ka ña'a é kākune'u iní ña, é kánuu iní ña tuku nuu i é ña te Xuva kó ne, nǎ nī'i ña é vā'á nta'a Xuva kō, nté ntā'a Cristu. ⁶ Nǎ ku dā vá'a nto é kāni nta'ví ña'a san nto te dotō tsi ntáka'an nǎ dovete, tsí kuenta iña i sá'ā ne, kué'e Xuva kō e dóo nto'o ña, da xōó ka ña'a é ña ncho kuintí'xe i ña. ⁷ Nǎ ku kudadii nto ni ña kuān ntāa san.

⁸ Dìvi ntō né, vata te ñīnēe mi ntaíka nto kídaā, ntá tsi vevíi ne, é nāxi'í Xuva kō mi ntaíka nto. Vií nto vata tsí ó de ña'a, ña é kaíka mí kaxi'í nuu ñu'u. ⁹ Tsí ña é kánaxi'í nuu í ne, kade ña é vā'a. Kade ña é ntio Xuva kō. Kade ña é

nuu é ntaā i. ¹⁰ Koo ntii nto vii ntó nee nuu i é díí ka va'a é vii ntó vatā o é ntio Xuva kō. ¹¹ Ná ku dotō tsí kini nuu nto nuu i e ntáde ña e ntaíka mí ñinēe, tsí ña kaidiá'vi. Ntá tsi nañe'ē ntó ña tsí ña te vá'a o ntáde ña. ¹² Tsi ntákuka'an nuu ko é ká'an o nuu i é ntáde xu'u ña. ¹³ Ntá tsi dā naxi'í nuu ñu'ú san ne, ntii díto nuu i é iō xu'ú, nte ntāa nti'xe. ¹⁴ Tsí ña te nee iña é kuvi koo xu'u dá kaxi'í nuu ñu'ú san. Dukuān ne, kaka'an ña:
 Ntoton, ñivīn é kakidin.
 Nakuntítsin mé'ñū ña xi'í san ne,
 Cristu naxi'í nuu ña nuu o,
 ka'an ña.

¹⁵ Koto vá'a nto nté o ntáde nto ve. Ná vii ntó vatā ó de ña tuntú san, ntá tsi víí nto vatā ó de ña e dóo ki'in iní i. ¹⁶ Koo ntii nto kada tsiñu nto vi'a iō ka ntuvi, tsi dóo iō nuu i é kīni kaa ntuvi sá'a. ¹⁷ Dukuān ne, ñá vii ntó vatā ó de ña tuntú san, ntá tsi kutuni nto nee é ntio Xuva kō é vii nto. ¹⁸ Ná ku de ki'vi ntō tsí dukuān ne, ña kúvi kotō kú've nto. Ntá tsi kué'e nto é kadā kú've Espiritū sán nima nto. ¹⁹ Kata nto nchu'ún ni tā'an nto. Kata nto un ntíí ntíí nuu i é káka'an tsi dóo ka'nu Xuva kō. Kaníí nima ntó kata nto iña Xuva ko. ²⁰ Nguentúvi nakué'e nto sintiá'vi nta'a Xuva ko iña é un nti'í da nēé ka nuu i kuenta iña Tó'o ko Jesūcristu.

Vata tsi te ñavi'i kō ña ntákuinti'xe i san

²¹ Víí nto é ntio ta'an nto, tsi ntaíko ñu'u ntō Cristu.

²² Dívi nto, ñadī'í, víí nto vatā ó ntáka'an xíí nto, vatā ó de nto nī Tó'o ko Jēsuu. ²³ Tsi ntádē kú've ñatíí san iña ñadi'í ña, vatā ó kade kú've Cristu iña ña ntákuinti'xe i ña. Dívi ñā né, kanakakū ñá un ntíí ntíí ña ntákuinti'xe i ña tsí uun tsi kúnū kúvi ña ni ñā. ²⁴ Vatā o ntáde ntaa ña ntákuinti'xe i é káka'án Cristú ne, kuan koo na kada ntaa ñadi'í san un nti'í é káka'an xíí ña.

²⁵ Dívi nto, ñatíí ne, na kuínima ntó ñadi'í ntó vatā o kuínima Cristu ña kuínti'xe i ña. Tsí xe'é ña ntuvi iña ña doméni kuenta iña ña, ²⁶ vata koo é nākate ña kuétsi ñā é nakutsi ntúte ña ña da kuínti'xe ña tú'un ñā. ²⁷ Kuān o dé ña vata koo é ntāda ña ña kuenta nta'a míí ñā, é vata kaa

ñadĩ'i, ña e dóo vá'a kaa. Dōo vá'a ntí'xe ña vata kaa uun doo e dóo nuu a'ví san é ña tuvi mí'i ni xē'e, ña tuvi mí'i ntútsi'i, ntá tsi vá'a kue'en. ²⁸ Du'vā ó kantio é kuinima ñatíi san ñadi'ĩ ñá, vatā ó kakuinima ña kúñu mii ñā. Te kakuinima ñá ñadi'ĩ ñá ne, kakuinima ña kúñu mii ñā dī. ²⁹ Xōxó ñatíi é ña ntío kue'en ña kúñu mii ñā, ntá tsi kaxé'e ña é ká'xí ne, kade ña i kuenta. Kuān ó kade Cristu ni ña ntákuinti'xe i ña dī, ³⁰ tsi ntáduku ntée ña ña. Xo'ō né, kuān o ntáduku ntée o kúñū Cristú dī. Tsi dadīi tsi kúñū kúvi o ni ñā. ³¹ Dukuān ne, kaka'an tū'un Xuva kō tsi xtuví mii ñatíi san uva ña ni dī'i ñā vata koo é kutini'i ña ñadi'ĩ ña. Ntuvi ñá ne, uun tsi kúñū kúvi ña, ka'an. ³² Sá'a nūu i e dóo ka'nu, é ña ini o. Ntá tsi kaka'an u sá'ā vata koo é kūtuni nto nté o de Cristu ni ña ntákuinti'xe i ña. ³³ Ntá tsi kuinima ntí'xe nto, é un é un nto, ñadi'ĩ ntó vatā o ntákuinima nto kúñu mii ntō. Ñadĩ'ĩ san ne, na kuiko ñu'u ña xī ña dī.

6

¹ Dīvi nto, i'xá, kada ntaa nto e ntáka'an úva nto ni dī'i nto, vatā o é ntio Xuva kō. Tsi vá'ā o é kuān koo vií nto. ² Tsi tū'ūn é kuvi ūun é kāka'an é nī'i ko é vā'á te kāda ntaa o ne, kaka'an: “Kuiko ñu'u nto uva nto ni dī'i ntō, ³ vata koo é kuntōo vá'a nto, vata koo e dóo kani ntuvi iña nto ñuxiví sa”, ka'an.

⁴ Dīvi ntō né, uvā, ña kú de nto é na kūdiin i'xá nto, tsí nakuē'nu vá'a nto i. Kué'e nto é ntō'o i te ña vá'a o ntáde ne, kué'e nto i i'tsi nté koo kuntikīn Xúva kō.

⁵ Dīvi ntō, ña ntáde tsiñu ne, kada ntaa nto e ntáka'an tó'o ntō, ñá ntoo ñuxiví sa. Kuiko ñu'u nto ñā. U'vī ntó ña. Kanī nima ntó vií nto tsiñu e ntáta'xí ña vata tsi tē ntáde tsiñu nto iña Crístu. ⁶ Kada ntaa nto, ñá te da mii tsī da ntaíto ntáde ña nto, vata koo é ka'an ñá tsi dóo va'á nto, ntá tsi kada ntaa ntí'xe nto vatā ó de ña kade tsiñu iña Xuva ko. Kanī nima ntó vií nto vatā ó ntio Xuva ko. ⁷ Vií nto tsiñu nto nīi kue'én ini nto, vata tsi te iña Xuva ko ntáde tsiñu nto, ñá te da iña ña'a tsi. ⁸ Ini ntó tsi da xōo ka ña'a, te ña kade tsiñu ne, o tē tó'o tsiñu ne, ní'i ñā é vā'á nta'a Xuva ko kuēnta iña i é vā'a é káde ña.

⁹ Divi ntō di, tó'o tsiñu, kuān koo vií nto nī ña ntáde tsiñu iña nto. Ná ku kadā xení nto ni ñā. Naka'an ntō tsí io Tó'o nto ntuvi ntó ña, ña é tuví e dukún kán né, divi ñā ne, ñā kāde ña kuentá nee ñá'a o.

Nté koo nada'an ña ntákuinti'xe i sán nima ña

¹⁰ Kaka'án u sá'a ni nto vē. Ntii na kōo nima nto ve, tsi ntáduku ntée nto Tó'o kō. Tsi dóo iō ntii ñā é ta'xi ña kō. ¹¹ Vata tsí ó kainúu sntadún san du'nu é kuvi káa ne, kuan tsí koo nakunúu nima nto Espíritu Xuva kō sán di, vata koo é ña kuvi vii Tó'o e ña vá'a san ní nima nto é ncho kani nta'ví nto. ¹² Tsi ñá te ntánaa o nī ña é iō kúñu i ni xiki i, tsi ntánāa o ni tatsin ña vá'a e dóo ntii iní i, e ntáde kú've iña ña ntaíka mi dóo neé ñuxiví sa, ni tātstin é ña vá'a é ntaíko e dukún kán. ¹³ Dukuān ne, ki'i nto un ntíñ ntíñ nuu i é káta'xi Xúva kō vata koo é kuvi vií nto nada'an ntō nima ntó te xēe ntúvi é kīni kaa san. Dá iō tu've vá'a nto ne, kutu kuntōo nto.

¹⁴ Dukuān ne, diin tsi kuntōo nto é nāki'ni kutu nto í'xi nto é nuu é ntaā í vatā o dé sntadún san ni ññ í'xi ña. Vii nto é vā'a vata koo é nada'an ntō nima ntó, vata tsí ó kanada'ān sntadún san nima ña é kaitavi núu ña du'nu káa san. ¹⁵ Vata tsí ó kaxio tú've di'in nto e ntaxí'i nto ntí'xen nto ne, kuan kōo koo tú've nto é kika'an ntódo nto tú'un va'á san nté koo kūntóo vá'a o. ¹⁶ Díí díí ka nuu á'vi ne, é kuinti'xe vá'a nto vata koo é nada'an ntō nima nto nuu i é kīni kaa é kanakuíta ntēe tó'o e ña vá'a san ntó, vata tsí ó de sntadún san dá kakāta nteé ña le'e káa san vata koo é ña dúku ña ntuvē é kai'xí san. ¹⁷ Vata tsí o kaitávi dīkí sntadún san ññ e'xín ña ne, kuan tsi koo nada'an nto dīkí ntó di é kuinti'xe ntō tsi é nakākú Xuva ko ntō. Kuní'i nto káa kāni iña Espíritū di, é diví tú'un Xuva kō. ¹⁸ Da neé ka é vii ntó ne, ka'an ntá'vī ntó ni Xuva kō. Kákan nto nta'a ña da neé ka nuu i é ká'an Espíritu ñā é kákan nto. Ntíto koo kuntōo nto. Ntē ña ku nátiivi iní nto. Utén utén ka'an ntó ni Xuva ko iña é un ntíñ ntíñ ña ntáduku ntēe ña. ¹⁹ Ka'an ntá'vī ntó kuenta iñá ko di, na ta'xi Xuva ko tū'un nee iña é ká'án u, vata koo é ña u'ví ko é ká'án u ni ñā'a iña tú'un va'á san é iō xu'ú iña ña. ²⁰ Xuva ko taxnúu ña ko é kēte

xaa u tú'un ñā né, dukuān é nuu kutū ú vevii. Ka'an ntá'vī ntó vata koo é ñā u'ví ko nté un siin é kā'án u tú'un ñā, vatā ó ntio ñā é kā'án u.

I'a ntí'i tutú san

²¹ Tiquicu, ení kō e dóo ntio ko, ñā e dóo xntíi kó tsiñu Xuva kō né, ntaa ñā ni ntō é un ntí'i iñá ko, vata koo é kūtuni nto nté o de ú ne, nee tsíñu kade ú ve. ²² Dukuān né, kataxnūu ú ñā é kī'in ñā mí ntoo nto vata koo é kā'an ñā ni ntō nté o de ntí, vata koo é na kíi nima nto é vii ntó tsiñu Xuva kō.

²³ Na ta'xi Xuva ko ni I'xā ñā, Tó'o ko Jesūcristu, é kuntōo vá'a un ntíi ntíi ta'an kō, é kuñnima tá'an ñā, é díi ka kuinti'xe ñā. ²⁴ Na naxnuu viko Xuva ko ūn ntíi ntíi ñā é ñā ni xtuví mii i e ntákuinima i Tó'o ko Jesūcristu káññi nima i. Kuan tsī koo é kā'án u ni ntō.

Tū'ún xuva kō vatā ó ntáka'an ña ñuú Coatzospan
 New Testament in Mixtec, Coatzospan (MX:miz:Mixtec, Coatzospan)
 copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
